

**«Հրազդանի էներգետիկ կազմակերպություն (ՀրազՋԷԿ)» բաց  
բաժնետիրական ընկերության էլեկտրական էներգիայի (հզորության)  
արտադրության №0145 լիցենզիայի**

**ՊԱՅՄԱՆՆԵՐԸ**

**1. ԼԻՑԵՆԶԻԱՅՈՒՄ ՕԳՏԱԳՈՐԾՎԱԾ ՀԱՄԿԱՑՈՒԹՅՈՒՆՆԵՐԸ**

1. Սույն լիցենզիայում օգտագործված հիմնական հասկացություններն են.

- 1) **Առևտրային կանոններ՝** Հանձնաժողովի կողմից հաստատված՝ Հայաստանի Հանրապետության էլեկտրաէներգետիկական մեծածախ շուկայի առևտրային կանոններ, որոնք կանոնակարգում են էլեկտրաէներգետիկական մեծածախ շուկայի մասնակիցների առևտրային փոխհարաբերությունները.
- 2) **Արձանագրություն՝** Հայաստանի Հանրապետության Ազգային ժողովի կողմից 2002 թվականի դեկտեմբերի 4-ին վավերացված՝ Հայաստանի Հանրապետության սեփականություն հանդիսացող «Հրազդանի ՋԷԿ»-ի գույքային համալիրը Ռուսաստանի Դաշնությանը ի սեփականություն փոխանցելու վերաբերյալ Հայաստանի Հանրապետության կառավարության և Ռուսաստանի Դաշնության կառավարության միջև կազմված արձանագրություն.
- 3) **Լիցենզավորված անձ՝** «Հրազդանի էներգետիկ կազմակերպություն (ՀրազՋԷԿ)» բաց բաժնետիրական ընկերություն.
- 4) **Հանձնաժողով՝** Հայաստանի Հանրապետության հանրային ծառայությունները կարգավորող հանձնաժողով.
- 5) **Շուկայի կանոններ՝** Հանձնաժողովի հաստատված էլեկտրաէներգետիկական շուկայի առևտրային և ցանցային կանոններ.
- 6) **Ցանցային կանոններ՝** Հանձնաժողովի կողմից հաստատված Հայաստանի Հանրապետության էլեկտրաէներգետիկական համակարգի ցանցային կանոններ, որոնք կանոնակարգում են հաղորդման և բաշխման ցանցերի զարգացման պլանավորման, կառավարման, կարգավորման և այդ ցանցեր մուտքի ապահովման հետ կապված հարաբերությունները:

## **2. ԼԻՑԵՆԶԻԱՅԻ ԳՈՐԾՈՂՈՒԹՅԱՆ ԺԱՄԿԵՏԸ ԵՎ ԼԻՑԵՆԶԱՎՈՐՎԱԾ ԳՈՐԾՈՒՆԵՈՒԹՅԱՆ ԱՇԽԱՐՀԱԳՐԱԿԱՆ ՏԱՐԱԾՔԸ (ՎԱՅՐԸ)**

2. Սույն լիցենզիան ուժի մեջ է մտնում 2004 թվականի նոյեմբերի 8-ից:

3. Սույն լիցենզիան գործում է մինչև 2019 թվականի նոյեմբերի 8-ին:

4. Սույն լիցենզիայի՝ սույն գլխով նախատեսված ժամանակահատվածի (ժամկետի) երկարաձգման անհրաժեշտության դեպքում Լիցենզավորված անձը Հանձնաժողովի կողմից սահմանված կարգով և ժամկետներում համապատասխան հայտ է ներկայացնում Հանձնաժողով:

5. Լիցենզավորված գործունեության իրականացման աշխարհագրական տարածքը (գործունեության վայրը) Հայաստանի Հանրապետության Կոտայքի մարզի Հրազդան համայնքի վարչական տարածքն է (Գործարանային փողոց):

## **3. ԼԻՑԵՆԶԱՎՈՐՎԱԾ ԳՈՐԾՈՒՆԵՈՒԹՅԱՆ ԷՈՒԹՅՈՒՆԸ ԿԱԶՄՈՂ ԳՈՐԾԱՌՈՒՅԹՆԵՐԸ**

6. Լիցենզավորված անձին իրավունք է տրվում և պարտավորեցվում է սույն լիցենզիայով սահմանված ժամկետում ջերմային էլեկտրակայանում (այսուհետ՝ Կայան) արտադրել էլեկտրական էներգիա (հզորություն)՝ սույն լիցենզիայի պայմանների №1 հավելվածով ամրագրված ագրեզատներով (սարքավորումներով):

7. Լիցենզավորված անձին իրավունք է տրվում՝

- 1) մեծածախ շուկայում վաճառել կամ արտահանել իր արտադրած էլեկտրական էներգիան (հզորությունը)՝ Շուկայի կանոնների համաձայն,
- 2) էլեկտրաէներգետիկական մեծածախ շուկայում գնել էլեկտրական էներգիա (հզորություն), եթե սեփական արտադրության էլեկտրական էներգիայով չի կարողանում կատարել իր պայմանագրային պարտականությունները:

8. Լիցենզավորված անձը Հանձնաժողովի սահմանած սակագներով պարտավոր է էլեկտրական էներգիա վաճառել երաշխավորված մատակարարին, մատակարարներին և որակավորված սպառողներին՝ Շուկայի կանոններով նախատեսված դեպքերում և կարգով: Մնացած դեպքերում Լիցենզավորված անձը էլեկտրական էներգիան կարող է վաճառել շուկայի մասնակիցներին կամ արտահանել չկարգավորվող գներով:

9. Լիցենզավորված անձը էլեկտրական էներգիան կարող է օգտագործել սեփական կարիքների համար՝ միայն էլեկտրական և (կամ) ջերմային էներգիայի արտադրության հետ կապված պահանջների բավարարման համար, եթե այլ բան սահմանված չէ Շուկայի կանոններով կամ Լիցենզավորված անձի հետ պետություն-մասնավոր գործընկերության շրջանակում կնքված գործարքով:

10. Հանձնաժողովի կողմից Կայանից առաքվող էլեկտրական էներգիայի սակագինը սահմանվում և վերանայվում է համաձայն «Էներգետիկայի մասին» Հայաստանի Հանրապետության օրենքի, Արձանագրության, Շուկայի կանոնների, Հանձնաժողովի այլ իրավական ակտերի:

11. Հանձնաժողովի կողմից Կայանից առաքվող էլեկտրական էներգիայի (հզորության) սակագներ չեն սահմանվում, եթե Կայանը Շուկայի կանոններով սահմանված դեպքերում և կարգով էլեկտրական էներգիան (հզորությունը) վաճառում է մրցակցային պայմաններով՝ չկարգավորվող գներով:

#### **4. ԼԻՑԵՆԶԱՎՈՐՎԱԾ ԳՈՐԾՈՒՆԵՈՒԹՅԱՆ ՊԱՅՄԱՆՆԵՐԸ**

12. Լիցենզավորված անձի գործունեությունը պետք է համապատասխանի Արձանագրությանը, «Էներգետիկայի մասին» Հայաստանի Հանրապետության օրենքի, այլ օրենքների, սույն լիցենզիայի, Ցանցային կանոնների, Առևտրային կանոնների, Հանձնաժողովի կողմից ընդունված և այլ իրավական ակտերի պահանջներին:

13. Լիցենզավորված անձի կողմից Կայանի կառուցումը և շահագործումն իրականացվում է համաձայն էլեկտրակայանի նախագծային փաստաթղթերով նախատեսված սխեմայի՝ բացառությամբ օրենսդրությամբ նախատեսված դեպքերի:

14. Լիցենզավորված անձը շուկայի օպերատորի հաշվառմանն է ներկայացնում մեծածախ շուկայում կնքված, ինչպես նաև էլեկտրական էներգիայի (հզորության) արտահանում նախատեսող պայմանագրերը՝ համաձայն Շուկայի կանոնների:

15. Լիցենզավորված անձը պարտավոր է կատարել էլեկտրաէներգետիկական համակարգի օպերատորի հրահանգները՝ համաձայն Ցանցային կանոնների:

16. Լիցենզավորված անձի 25 և ավելի տոկոս բաժնեմասի (բաժնետոմսի, փայի) կամ դրա նկատմամբ իրավունքի օտարման, այլ կերպ փոխանցման, գրավադրման, ինչպես նաև Լիցենզավորված անձի որոշումները կանխորոշելու հնարավորություն տվող բաժնեմասի (բաժնետոմսի, փայի)՝ անկախ քանակից, օտարման, այլ կերպ փոխանցման կամ գրավադրման դեպքում Լիցենզավորված անձը պարտավոր է Հանձնաժողովի սահմանած կարգով նախապես ստանալ Հանձնաժողովի համաձայնությունը:

17. Լիցենզավորված գործունեության իրականացման համար անհրաժեշտ հիմնական գույքի կամ դրա նկատմամբ իրավունքի օտարման, այլ կերպ փոխանցման կամ գրավադրման համար Լիցենզավորված անձը պարտավոր է Հանձնաժողովի սահմանած կարգով նախապես ստանալ Հանձնաժողովի համաձայնությունը:

18. Սույն լիցենզիայի 16-րդ, 17-րդ կետերի և Արձանագրության 1-ին հոդվածի 3-րդ կետի միջև հակասությունների դեպքում գործում է Արձանագրության համապատասխան կետը:

19. Համաձայն Արձանագրության 7-րդ հոդվածի 1-ին կետի՝ Հանձնաժողովը Շուկայի կանոններով սահմանում է այնպիսի պայմաններ, որոնք կապահովեն լիարժեք (100%) վճարում Հայաստանի Հանրապետության ներքին սպառման համար առաքված էլեկտրական էներգիայի և հզորության դիմաց՝ համաձայն էլեկտրաէներգիայի առուվաճառքի պայմանագրերի:

20. Համաձայն Արձանագրության 7-րդ հոդվածի 2-րդ կետի՝ Հանձնաժողովը երաշխավորում է Լիցենզավորված անձին կամ նրա իրավահաջորդներին Սակագնի մակարդակ, որը հիմնական միջոցները աշխատունակ վիճակում պահելու պայմաններում թույլ կտա ապահովել գույքային համալիրի ձեռք բերման արժեքի՝ 31.0 միլիոն ԱՄՆ դոլարի վերադարձը, հաշվի առնելով սղաճը, ոչ ավելի, քան 15 տարվա ընթացքում՝ առանց ներառելու արտահանման եկամուտները: Ընդ որում, արտահանումից ստացված շահույթի մինչև 50%-ը օգտագործվում է Լիցենզավորված անձի կամ նրա իրավահաջորդների կողմից՝ Հանձնաժողովի հետ համաձայնեցնելով: Գույքային համալիրի արժեքի վերադարձի աղբյուր են հանդիսանում Սակագնում հաշվի առնված շահույթը և մաշվածությունը:

21. Համաձայն Արձանագրության 7-րդ հոդվածի 3-րդ կետի՝ Սակագնի հաշվարկի մեթոդոլոգիական հիմք է հանդիսանում երկդրույք Սակագինը, որն ապահովում է հաստատուն և փոփոխական ծախսերի հատուցումը՝ ներառյալ շահույթը: Շահույթի հաշվարկման բազան որոշվում է գուտ ակտիվների և շրջանառու միջոցների արժեքի գումարով, որոնք համաձայնեցված են Հանձնաժողովի հետ: Զուտ ակտիվների գումարը որոշվում է որպես գույքային համալիրի ձեռք բերման և օգտակար օգտագործվող ակտիվներում Ներդրումների գումար:

Գույքային համալիրի ձեռք բերման արժեքի (31.0 միլիոն ԱՄՆ դոլար) վերադարձից հետո, հաշվի առնելով լրացուցիչ Ներդրումները, Լիցենզավորված անձի կամ նրա իրավահաջորդների գործունեության կարգավորումը իրականացվում է ընդհանուր հիմունքներով:

22. Համաձայն Արձանագրության 6-րդ հոդվածի 1-ին կետի՝ Լիցենզավորված անձը իրավունք ունի տնօրինել լրացուցիչ շահույթը, որը ստացվել է սեփական ռեսուրսների հաշվին ծախսումների տնտեսման արդյունքում՝ առանց այդ հատվածում գործող Սակագնի վերանայման:

23. Սույն լիցենզիան չի կարող այլ անձանց օգտագործման տրվել, օտարվել կամ գրավադրվել, իսկ դրանով ամրագրված էլեկտրական էներգիայի արտադրության գործառույթը որևէ ձևով փոխանցվել այլ անձի, բացառությամբ օրենքով նախատեսված դեպքերի:

24. Սույն լիցենզիայի գործողությունը չի տարածվում Լիցենզավորված անձի հետ համատեղ, այդ թվում՝ համատեղ գործունեության պայմանագրով գործունեություն իրականացնող այլ անձանց, ինչպես նաև Լիցենզավորված անձի մասնակցությամբ հիմնադրված կամ գործող իրավաբանական անձանց վրա:

25. Լիցենզավորված անձը պարտավոր է ապահովել լիցենզավորված գործունեության իրականացման համար անհրաժեշտ և այդ գործունեության մեջ

ներգրավված գույքի հասանելիությունը Հանձնաժողովի ներկայացուցիչների համար:

26. Լիցենզավորված անձի կողմից իրականացվող տնտեսական այլ գործունեությունը չպետք է վտանգի սույն լիցենզիայի պայմանների պատշաճ կատարումը, իսկ լիցենզավորված գործունեության հաշվապահական հաշվառումը պետք է առանձնացված լինի Լիցենզավորված անձի կողմից իրականացվող այլ գործունեության հաշվապահական հաշվառումից:

27. Լիցենզավորված անձը պարտավոր է Հանձնաժողովի կողմից սահմանված կարգերին և ձևերին համապատասխան լիցենզավորված գործունեության մասին տեղեկատվություն և հաշվետվություններ ներկայացնել Հանձնաժողով:

28. Լիցենզավորված անձը պարտավոր է Հանձնաժողովի պահանջով ներկայացնել լիցենզավորված գործունեության վերաբերյալ սպառիչ տեղեկատվություն, ինչպես նաև պատասխանել Հանձնաժողովի գրավոր հարցադրումներին 10 աշխատանքային օրվա ընթացքում, եթե Հանձնաժողովի կողմից այլ ժամկետներ սահմանված չեն:

29. Լիցենզավորված անձը պարտավոր է յուրաքանչյուր տարի իրականացնել նախորդ տարվա ֆինանսական հաշվետվությունների աուդիտ և աուդիտորական եզրակացությունն ստանալուց հետո, իսկ տարեկան հաշվետվությունը բաժնետերերի կամ մասնակիցների ընդհանուր ժողովի կողմից հաստատվելու դեպքում՝ դրանց հաստատումից հետո՝ 10 աշխատանքային օրվա ընթացքում, աուդիտորական եզրակացության և աուդիտ իրականացված ֆինանսական հաշվետվությունների պատճենները ներկայացնել Հանձնաժողով, ինչպես նաև հրապարակել Հայաստանի Հանրապետության հրապարակային ծանուցումների <http://www.azdarar.am> կայքում:

30. Լիցենզավորված անձը պատասխանատվություն է կրում Հանձնաժողով ներկայացրած լիցենզավորված գործունեության մասին հաշվետվությունների և այլ տեղեկատվության հավաստիության համար:

31. Լիցենզավորված անձի կողմից Հանձնաժողով ներկայացված տեղեկատվությունը հրապարակային է, եթե դա Լիցենզավորված անձի կողմից չի համարվում գաղտնի և նշված չի որպես «ընկերությանը վերաբերող գաղտնապահական տեղեկատվություն»: Լիցենզավորված անձի ներկայացրած գաղտնապահական տեղեկատվության հետ կապված հարցերը կարգավորվում են «Էներգետիկայի մասին» Հայաստանի Հանրապետության օրենքով և այլ իրավական ակտերով:

32. Լիցենզավորված անձը պարտավոր է Հանձնաժողովին անմիջապես հայտնել այն հանգամանքների մասին, որոնք հանգեցրել են սույն լիցենզիայի պայմանների խախտումների կամ կարող են դառնալ սույն լիցենզիայի պայմանների խախտումների անմիջական պատճառ:

33. Սույն լիցենզիայի պայմաններով նախատեսված իրազեկումը, այդ թվում փաստաթղթերի հանձնումը, կատարվում է օրենքով սահմանված կարգով և ժամկետներում:

## 5. ԼԻՑԵՆԶԱՎՈՐՎԱԾ ԳՈՐԾՈՒՆԵՈՒԹՅԱՆ ՎԵՐԱՀԱՄԱՅՈՒՄԸ

34. Լիցենզավորված գործունեության վերահսկումն իրականացնում է Հանձնաժողովը:

35. Լիցենզավորված գործունեության վերահսկումն ապահովելու նպատակով Հանձնաժողովի ներկայացուցիչներն ունեն ազատ մուտքի իրավունք Լիցենզավորված անձի տարածք՝ Հանձնաժողովի սահմանած կարգով:

36. Լիցենզավորված անձը վերահսկման իրականացման ընթացքում պետք է աջակցի Հանձնաժողովին՝ անհրաժեշտության դեպքում տրամադրելով համապատասխան փաստաթղթեր:

## 6. ՏՈՒԺԱՆՔՆԵՐԸ

37. Լիցենզավորված անձի կողմից «Էներգետիկայի մասին» Հայաստանի Հանրապետության օրենքի դրույթները, Հանձնաժողովի ընդունած իրավական ակտերը, սույն լիցենզիայի պայմանները չկատարելու կամ ոչ պատշաճ կատարելու դեպքերում Հանձնաժողովն իրավասու է տալու խախտումները վերացնելու վերաբերյալ հանձնարարականներ և կարող է կիրառել տուժանքների հետևյալ տեսակները՝

- 1) նախազգուշացում.
- 2) օրենքով սահմանված տուգանքներ.
- 3) լիցենզիայի գործողության կասեցում.
- 4) լիցենզիայի գործողության դադարեցում:

38. Լիցենզավորված անձի կամ Հանձնաժողովի նախաձեռնությամբ սույն լիցենզիայի գործողությունը դադարեցնելու դեպքում Հանձնաժողովը և Լիցենզավորված անձը ղեկավարվում են «Էներգետիկայի մասին» Հայաստանի Հանրապետության օրենքով և Հայաստանի Հանրապետության օրենսդրությամբ:

39. Լիցենզավորված անձը սույն լիցենզիայի պայմանների 37-րդ կետում նշված խախտումների համար պատասխանատվություն չի կրում, եթե դրանք հետևանք են ֆորս մաժորի: Սույն լիցենզիայի պայմանների իմաստով ֆորս մաժոր է համարվում ցանկացած հանգամանք կամ դեպք (դրա հետևանք), որը հանգեցրել է (հանգեցնում կամ կարող է հանգեցնել) Լիցենզավորված անձի պարտավորությունների չկատարման կամ ոչ պատշաճ կատարման և միաժամանակ բավարարում է հետևյալ պայմաններին՝

- 1) չի գտնվում Լիցենզավորված անձի վերահսկողության ներքո.
- 2) Լիցենզավորված անձը ձեռնարկել է բոլոր անհրաժեշտ միջոցները և ջանքերը (այդ թվում՝ նախազգուշական, այլընտրանքային, օրենսդրությամբ նախատեսված) նշված հանգամանքները (հետևանքները) կանխելու, վերացնելու, մեղմելու կամ դրանցից խուսափելու համար.

- 3) Լիցենզավորված անձը տեղեկացրել է Հանձնաժողովին իրազեկվելուց հետո հնարավորինս սեղմ ժամկետում, բայց ոչ ուշ, քան այդ մասին իրազեկվելուց հետո 10 աշխատանքային օրվա ընթացքում:

40. Սույն լիցենզիայի պայմանների իմաստով, մասնավորապես, ֆորս մածոր են՝

- 1) բնական և տեխնածին աղետները, համաճարակները, բնության ուժերի արտասովոր դրսևորումները (այդ թվում՝ ջրհեղեղներ, երկրաշարժեր, փոթորիկներ, պտտահողմեր, կայծակով և ամպրոպով ուղղորդվող հորդառատ անձրևներ, ձնաբքեր, սողանքներ), ատոմային, քիմիական կամ կենսաբանական աղտոտում, գործադուլները, հասարակական անկարգությունները.
- 2) ապստամբությունները, ահաբեկչությունները, պատերազմները, ներխուժումները, զինված հակամարտությունները, արտաքին թշնամու գործողությունները կամ շրջափակումը, որոնցից յուրաքանչյուրը տեղի է ունենում Հայաստանի Հանրապետության տարածքում, կամ ներգրավում է այն, ինչը գոյություն չի ունեցել կամ չէր կարող ողջամտորեն կանխատեսվել.
- 3) պետական և տեղական ինքնակառավարման մարմնի կամ այլ իրավասու կազմակերպության ակտը, գործողությունը կամ անգործությունը այն դեպքում, երբ դրա արդյունքում չի տրամադրվել, չի երկարաձգվել սույն լիցենզիայով ամրագրված պարտավորության կատարման համար անհրաժեշտ որևէ թույլտվություն կամ իրավունք կամ խոչընդոտվել է այդ պարտավորության կատարումը, պայմանով, որ Լիցենզավորված անձը գործել է համաձայն Հայաստանի Հանրապետության օրենսդրության:

41. Սույն լիցենզիայի պայմանների 40-րդ կետը չի սահմանափակում Լիցենզավորված անձի իրավունքը նկարագրվածից բացի այլ արտակարգ և անկանխելի դեպքեր ու հանգամանքներ ի հայտ գալու պարագայում դիմել Հանձնաժողով՝ սույն գլխի պահանջներին բավարարելու դեպքում դրանք ևս ֆորս մածոր ճանաչելու համար:

## **7. ԼԻՑԵՆԶԻԱՅԻ ՓՈՓՈԽՈՒԹՅՈՒՆՆԵՐԸ**

42. Սույն լիցենզիայում փոփոխություններ կարող են կատարվել Լիցենզավորված անձի կամ Հանձնաժողովի նախաձեռնությամբ՝ Հանձնաժողովի կողմից սահմանված կարգով:

43. Հանձնաժողովի նախաձեռնությամբ սույն լիցենզիայի փոփոխությունները կատարվում են Լիցենզավորված անձի համաձայնությամբ, բացառությամբ այն դեպքերի, երբ նախատեսվող փոփոխություններն անհրաժեշտ են Հայաստանի Հանրապետության օրենքների և նորմատիվ իրավական ակտերի պատշաճ կատարումն ապահովելու համար:

44. Լիցենզավորված անձի վերակազմակերպման կամ նրա անվանման կամ գտնվելու վայրի փոփոխման դեպքում Լիցենզավորված անձը պարտավոր է այդ փոփոխություններն իրավական ուժ ստանալու օրվանից սկսած 15 օրյա ժամկետում

սույն լիցենզիայի վերաձևակերպման հայտ ներկայացնել Հանձնաժողով,  
բացառությամբ օրենքով նախատեսված դեպքերի:

«Հրազդանի էներգետիկ կազմակերպություն (ՀրազԶԷԿ)» բաց  
բաժնետիրական ընկերություն

(ընկերության անվանումը)

Հայաստանի Հանրապետություն, Կոտայքի մարզ, քաղաք Հրազդան,  
Գործարանային փողոց

(գտնվելու վայրը)

ՀԱՆՁՆԱԺՈՂՈՎԻ ԳԼԽԱՎՈՐ ՔԱՐՏՈՒՂԱՐ՝

Ա. ՍԱՖԱՐՅԱՆ



«Հրազդանի էներգետիկ կազմակերպություն (ՀրազԶԷԿ)» բաց  
տրված է բաժնետիրական ընկերությանը  
(լիցենզավորված ընկերության անվանումը )

ՑԱՆԿ

Կայանում տեղակայված ագրեգատների (սարքավորումների)

| Հիմնական<br>ագրեգատի<br>(սարքավորման)<br>անվանումը և<br>կայանային համարը | Ագրեգատի<br>(սարքավորման)<br>մակնիշը | Ագրեգատի<br>(սարքավորման) նոմինալ<br>հզորությունը կամ<br>արտադրողականությունը | Շահագործման<br>հանձնելու<br>տարեթիվը |
|--------------------------------------------------------------------------|--------------------------------------|-------------------------------------------------------------------------------|--------------------------------------|
| Շոգետուրբին N2                                                           | ΠΤ-50-130/7                          | 50 ՄՎտ                                                                        | 1967թ.                               |
| Գեներատոր N2                                                             | TBΦ-60-2                             |                                                                               |                                      |
| Շոգեկաթսա N2                                                             | БК3-320                              |                                                                               |                                      |
| Շոգետուրբին N3                                                           | T-100-130                            | 100 ՄՎտ                                                                       | 1969թ.                               |
| Գեներատոր N3                                                             | TBΦ-100-2                            |                                                                               |                                      |
| Շոգեկաթսա N3                                                             | БК3-320                              |                                                                               |                                      |
| Շոգետուրբին N4                                                           | T-100-130                            | 100 ՄՎտ                                                                       | 1969թ.                               |
| Գեներատոր N4                                                             | TBΦ-100-2                            |                                                                               |                                      |
| Շոգեկաթսա N4                                                             | БК3-320                              |                                                                               |                                      |
| Բլոկ N1                                                                  |                                      |                                                                               |                                      |
| Շոգետուրբին N1                                                           | K-200-130                            | 200 ՄՎտ                                                                       | 1971թ.                               |
| Գեներատոր N1                                                             | TГB-200 M                            |                                                                               |                                      |
| Շոգեկաթսա N1                                                             | БК3-640                              |                                                                               |                                      |
| Բլոկ N2                                                                  |                                      |                                                                               |                                      |
| Շոգետուրբին N2                                                           | K-200-130                            | 200 ՄՎտ                                                                       | 1971թ.                               |
| Գեներատոր N2                                                             | TГB-200 M                            |                                                                               |                                      |
| Շոգեկաթսա N2                                                             | БК3-640                              |                                                                               |                                      |

|                |           |         |        |
|----------------|-----------|---------|--------|
| Բլոկ N3        |           |         |        |
| Շոգետուրբին N3 | K-200-130 | 200 ՄՎտ | 1972թ. |
| Գեներատոր N3   | ТГБ-200 М |         |        |
| Շոգեկաթսա N3   | БКЗ-640   | 640 տ/ժ |        |
| Բլոկ N4        |           |         |        |
| Շոգետուրբին N4 | K-200-130 | 200 ՄՎտ | 1974թ. |
| Գեներատոր N4   | ТГБ-200 М |         |        |
| Շոգեկաթսա N4   | БКЗ-640   | 640 տ/ժ |        |